

編號 一

【四季个感動】李怡蘋原作

佢屋下脣頭有一隻細公園，對佢間肚个窗門看出去，堵堵好摺一頭大樹相對面，一年四季，佢長下探頭出去看佢千變萬化个面貌。青葉、白花、黃枝，還有在大樹下石凳頂坐寮个人，無論春夏秋冬都像一幅幅靚靚个圖畫，佢單淨坐等看就做得感受著四季个變換。毋過，四季分佢感受著个毋單淨係靚到耐毋得个景色，還有个就係佢對人生个體會。

今年新春時節，空氣裡肚都係春天甜甜个味緒，萬物都有新氣象，佢屋下也有好事來到。四十零歲个滿叔，望恁多年總算分佢望著一個妹仔咧。這細嬰兒肉卒卒个臉身，紅冬冬仔个面頰卵，還得人惜哦！人講，人个一生可比一年四季，恁樣，這正出世个細老妹應該算係春天咧！佢幼幼嫩嫩个手指公，就像春天樹桮頂正綻出个嫩芽，佢人生个四季正開始，定著愛當細心細意照顧，望佢定定仔大。

想啊想仔，這十過年來，爺哀毋知費忒幾多个心力，正有好摺佢對細細隻仔撚¹到這下恁大人。來到人生夏季个爺哀，愛擔起

个責任重、壓力大。佢兜當像熱天个大樹，風搓來發風落水，為著遮等一屋下人，高大个樹梗愛耐等企到澄澄；在熱燂燂个日頭下，甘願自家分日頭晒，乜愛用青溜溜个樹葉仔抵等坐在樹下个佢兜。

人講：「春有百花夏有風，秋有月華冬有雪。」這係四季無共樣个景色，也係人生變換个過程。佢兜个腳步緊行緊遠，年堵年毋識停跔，一隻正愛來，一隻煞煞就走咧，毋堵好一眨眼這四季就過忒咧。有一擺，佢姆看等該頭大樹柔柔仔講：「秋天一到，這樹葉敢怕就愛離枝咧。」佢知佢姆想著明年佢愛去外背讀書當毋盼得，佢安慰佢講：「毋怕啦！等春天時節佢就倒轉來咧啊！」

前一駁仔聽佢姆講，窗門外背該頭大樹老咧、著病咧，佢心頭一顫。係啊！佢仰無想著爺哀有一日也會行到人生最尾个季節呢！春天會再過來，毋過人生个四季斯無再過一輪个機會啊！從細，係佢兜陪等佢，一年過一年感受四季無共樣个感動。係有一日，佢兜个冷天來咧，換佢做佢兜燒暖个細日頭，陪等佢兜共下回憶人生中每一隻感動个春夏秋冬。

¹ 撚：音 ngien'；拉拔長大之意。

編號 二

【賣山楂糖个老阿公仔】林淑貞原作

記得有一年入冬過，見到拜六个臨暗仔，佢社區个巷仔口，就會坐等一隻大約六、七十歲个老人家，脣頭一臺三輪車，頂高放等淦淦撈撈个玲琅雜貨，還插等幾下十支餞糖个山楂，紙牌頂个字潦潦草草，寫等一支二十籊。紅啾啾个糖膏在細鑊肚滾到緊嘍波，老人家撈竹籤仔刺落生山楂个中央，不時又愛踴起來攙一下糖膏。佢上上下下，從來毋識看著有人撈佢交關。有一日，看著佢蹶起蹶落个身影，慢趁慢趁仔，佢心肝肚一陣酸苦，決定愛跔工去買佢个山楂糖。

老人家一看著有人行兼，煞煞就出聲：「細阿妹仔，山楂糖又甘又甜，罔食哦！」佢細心細意包起糖仔。佢撈佢看詳細，像這冷到入骨个天時，老阿公正著一領起毛起毛个膨紗衫撈薄薄仔个運動褲，外背加一領當舊个袂仔，腳著等掣仔鞋，連襪斯無。坐在這正正當風口，佢个面頰卵分冷風交到紅紅熟熟，兩隻密密緊顫个手巴掌也必到這一空該一空。看著恁樣，佢个喉嚨頭嘎硬鉸硬鉸，毋知愛仰般正好。看等就會斷烏咧，佢講：「阿公，好轉夜咧，這風冷颼颼仔，轉去屋下較燒暖。」「毋怕，這兜賣忒

正來去轉。」車頂怕還有一、二十支賣忒，這愛賣到哪兩時正得。恁樣替佢愁也無較增，好得佢黏時就想著一隻辦法。

「阿公，你這做下賣佢好無？暗晡夜佢有人客，買分佢兜食甜堵堵好。」佢挑挑講到當暢，像解決一隻大問題樣。也毋知阿公係看識佢个打算無，佢講：「恁敗勢，愛監你撈佢買淨淨。」毋過好得佢又肯賣，佢攞等一大袋个山楂糖，無加講就轉咧，驚怕阿公過意毋去會反心毋肯賣。佢緊行緊試著心肝活開¹，行到遠遠正幹轉頭看，阿公正經收好攤仔、牽起車愛轉咧。毋過佢个目汁在目珠肚換來換去，看毋真阿公踏三輪車个背影咧。

下後佢就毋識堵著該隻山楂阿公咧，聽鄰舍講，換厥心白去市場賣，佢在屋下渡孫仔，毋使恁勞碌咧。老人家本旦就係愛享福个，人講：「家有一老，像有一寶。」多一息尊重合孝心，佢兜就毋會受苦。社福制度也愛全力來照顧無佷無憑个孤栖老人，恁樣个社會毋係正有希望！

¹ 心肝活開：音 sim` gon` va` koi`；心花朵朵開。

編號 三

【迎龍】鄭孝國原作

過年個時節，有豐沛個團圓飯，有砵年錢好領，還有紙炮好打，也有當多生趣好搞個齣數，正經係三日三夜都講毋煞哦！除忒這兜，還有一種係佢最有興趣個活動，該就係——迎龍。

佢戴在苗栗這隻客家莊，這位有別位罕得看著個客家傳統活動——迎龍。對過年前開始膏龍、牽龍，大概對正月初九天公生開光點眼過後，連連續續個活動——迎龍、煬龍、跔龍正式開始，滿哪仔鬧熱煎煎。愛直直到正月十八該日子時化龍歸天，這活動正算圓滿結束。

佢最好箭等自行車無就騎奧多拜跔等龍隊，到各莊頭去看龍隊表演，還會訂工去查今晡日哪位有包龍，佢就提前到該號位仔。等時間一到，包龍個店頭家，會打各種個紙炮、天花炮。一開始還看得著迎龍个人在該鑽上鑽下、跳來跳去，到紙炮越煬越猛，目珠前歸片濃濃¹，既經看毋真迎龍个人馬，單淨看著一條龍在紙炮陣肚騰雲駕霧，這時合等並令砰浪個紙炮聲，正經分人感覺著虔誠、鬧熱又吉祥。

「迎龍」，係佢最中意個過年活動，因為佢毋單淨生趣、鬧熱，還表現出客家藝術個靚。迎龍又有人講「搞龍燈」。龍圈仔係用竹篾編個，頂高貼等靚靚個布紗，再過門上竹棍變成做得擎起來迎個龍燈。撈這龍燈一節一節綰成龍身，最尾撈龍頭、龍尾接上去，哇！金晶矚燿²個色目實在還打眼哪！龍頭撈龍尾最講究，全愛照規矩來，正做得「慢工出幼貨」，係講一無注意，全無精氣神韻，該就爭大碼咧！除忒膏龍愛注意以外，龍愛迎來生、迎來順序，全食擎龍珠个人指揮。龍本身就當重，加勝迎龍係多人合作個表演，一無配合好，就會漏氣³，毋係龍打結，就係人跔倒⁴。為著表現出龍個精神撈活跳，愛迎來好，定著愛煞猛練習正會鬥搭，正做得表現出力頭撈美感。

年節活動千百樣，佢最中意個就係迎龍，毋單淨係因為迎龍這活動鬧熱又生趣，還因為龍本身也係客家精神個信仰代表。另外，膏龍個功夫也係客家手工藝術個傳承。所以佢當欣賞迎龍，也歡迎大自家有閒來佢個家鄉，共下來欣賞這精彩個年節活動——迎龍。

² 金晶矚燿：音 gim` zi` ngiab lang`；物品的外貌亮晶晶。

³ 漏氣：音 lau` kui`；閩南語借詞。比喻行為表現令人失望。

⁴ 跔倒：音 doi` do`；跌倒。

¹ 濃濃：音 ngiung ngiung；煙霧瀰漫貌。